

江寧鄉土誌卷下

第四十一課 工業一 織緞

金陵工業。以緞業為大宗。織機之工。多秣陵關人所居。皆在新橋上浮橋以西。其搖絲成經者。謂之白行。業白行者。多係太平門及神策門外人。至染經之染坊。則在牛市船板巷左近。蓋秦淮西流水。以之漂絲。其色黝而明。尤於玄緞為宜。猶之鎮江大紅。蘇州玉色。西湖杭色。皆遷地弗良也。

江寧鄉土誌

卷下

第四十二課 工業二 續前課

經既染成。分散絡工。絡工貧女也。日可絡三四窠。為一東窠繞之於篋。經篋交齊。則植二竿於前。兩人對牽。謂之牽經。牽畢。即上絲接頭。新舊並繫。兩端相續。如新置之機。無舊頭可接。則必先撈範子。然後從交竹中縷縷分之。謂之通交。而織工乃有所藉手矣。若夫儲材待用。如機店。筦店。梭店。篋子。絡梭竹器店。範子行。挑花邊線行。則皆附屬於機業者也。

第四十三課

工業三

織布

織布一業。自昔所無。近年以來。先後設立南城貧民工藝廠。東城善後工藝廠。利生工廠。皆以織布為大宗。以及商立小公司。與夫散居織戶。或織各色愛國布。或織手巾。消行以本城為多。其機以木為之。每具需銀約十元左右。每機日可出三四丈。織工以尺丈計。工價每丈約錢六七十文。此等工藝。若逐漸推廣。是亦籌貧民生計之一要事也。

江寧鄉土誌

卷下

二

第四十四課

工業四

刻字

印刷

在昔金陵為圖書之府。明時有南監板。較北監為精工。即近時金陵官書局刊印之經史。亦在他省上。陶吳鎮人善於剗刷。故京師雕刻書板之匠。江寧南鄉人居其大半。近日擺板及鉛印石印之法盛行。印刷之業漸即發達。除省立之印刷廠外。排字印刷之鋪。亦日漸增多矣。

第四十五課

工業五

雜藝

北鄉石埠橋龍潭等處。善治扇骨。水磨模雕。各擅其技。鍾靈鄉竇村之石工最著名。又如鐫刻瓷器。備極精巧。雖曰小品。亦極手工之能事。高橋門上方鎮定林一帶之人。則善於修造時辰鐘表。土橋索墅等處婦女。以麥稽製成草帽緘。消行於鄰近各邑。各鄉如能仿行。則吾邑之人。工物產。亦可增一利源也。

江寧鄉土誌

卷下

三

第四十六課

商業一

商會

商埠

城東復成橋。舊有江南商務總局。商會即設於此。內附設商品陳列館。民國成立。分設商會事務所於李府巷。改稱南京總商會。商品陳列館遂停辦。至江寧開為商埠。始於清光緒二十三年。迨二十五年。設立金陵關。征收出口入口之貨物稅。入口貨以洋紗洋布煤油沙糖為大宗。出口貨以緞天鵝絨藥材皮革為大宗。

第四十七課 商業二 錢業

江寧錢業。為各業之總機關。向來以銀為本位。元寶一錠。重量約在五十兩左右。又有散紋曰夔關。自四川來曰荊州。自湖北來曰馬蹠錠。自河南南來曰方漕。自湖南安徽來曰寶塊。以元寶用夾剪剪斷者官庫出納。及鑄局往來。皆用之。自日斯巴利亞及墨西哥所鑄之銀元輸入中國。用銀者遂少。日國所鑄者謂之本洋。墨國所鑄者謂之鷹洋。

江寧鄉土誌

卷下

四

第四十八課 商業三 續前課

鷹洋之入中國。在民國紀元前五十年。前清同治初年每元值銀七錢上下。寧垣商店一律通用。光緒初。中國自鑄銀元。謂之龍洋。與鷹洋並行。而其值稍減。民國四年。重行改鑄。一面嵌大總統肖像。一面嵌嘉禾紋。清色潔。誠重寶也。江寧錢法。始則通用制錢。九八為陌。九五為底。謂之九八五。每千文底實九百七十四文中多攬以小錢。青薄者曰青板。極小者曰鵝眼。極薄者曰廬州匡。頗不暢用。自官鑄當十銅元。而市面始無錢荒之苦。

第四十九課

商業四

緞業

寧垣業緞業者。名曰帳房。多萃集於門西一帶。因地勢高聳。不易受濕。於緞最為適宜。每歲夏初。鄉絲上市。帳房停織。謂之歇新絲。其實避霉濕也。機戶領織。謂之代料。織成送緞。主人校其良否。謂之讐貨。包裹緞疋。謂之筒貨。其銷路最廣。而以直隸山東廣東兩湖四川等省為尤多。

江寧鄉土誌

卷下

五

第五十課

商業五

京廣雜貨業

城內京廣貨鋪。向售北京廣東貨物為多。自東西洋貨物輸入中國。遂改京廣為洋廣。而東洋之貨尤盛。如磁杯洋燈洋傘牙粉胰皂之類。人多樂用之。以其價較西洋為廉也。其實物質輕薄。不能耐久。遠遜我國貨。人以其價廉而取之。誤矣。其他為雜貨鋪。城廂內外。不下千餘家。而大小不一。小者俗名香蠟店。只售零星油糖醬醋香燭等物。大者兼售海味。謂之南貨店。

第五十一課 商業六 雜業

寧垣綢布二業。其物品多由外省運入。自洋布洋緞及各種呢盛行。遂為一大漏卮。欲挽回利權。當注意於改良工藝。其有外省之人。而設肆於寧垣者。如衣服茶葉筆墨等業。多安徽人。磁業係江西人。煙業係福建人。金業係浙江人。皮貨業係直隸人。又有所業同而設肆之地點亦同者。如米業則萃於南門外。北貨行則萃於水西門外。書業則萃於城中狀元境是也。

第五十二課 教育一

江寧小學。創辦於前清光緒二十八年。至民國二年。寧垣亂後。小學校重行改組。現有縣立高等小學校一。女子高等小學校一。乙種商業學校一。就十六市鄉分為八學區。屬於區立者有高等小學校五。國民學校八十六。私立者則有高等小學校一。女子高等小學校一。國民學校十一。統計全縣教育經費。每年約需六萬元。就學兒童。統計約六千人。全縣學齡兒童。將及十萬。就學者現僅得十六分之一云。

第五十三課 教育二

省垣之內。除各小學校外。屬於省立者有第四師範學校。第一女子師範學校。第一中學校。第一工業學校。第一農業學校。法政專門學校。私立者有鍾英中學校。國立則有南京高等師範學校。河海工程專門學校。海軍雷電學校。以外有貧兒教養院二。均由省款設立。其東城之貧兒院。係專教養旗民子弟。

江寧鄉土誌

卷下

七

第五十四課 交通一 鐵路

江寧為東南都會。四通八達。滬寧鐵路。由南京至上海。車站設於下關。津浦鐵路。由浦口至天津。車站設於對岸之浦口。乘車者由下關乘小輪船渡江。頃刻可達。謂之輪渡。若浦信鐵路。由浦口至信陽。寧湘鐵路。由南京至湖南。路線均已勘定。尚未開工。寧省鐵路。則由城內中正街至下關。共有四站。每日計開行四十四次。

第五十五課 交通二 輪船
下關為通商口岸。往來輪船。下至上海。上至漢口。均於此為停泊之所。每日上下水約有二三艘。其往來各埠之小輪船。則下水開往六合。十二圩。鎮江。揚州等處。上水開往北河口。大勝關。江寧鎮。烏江。石馬河。采石。太平。蕪湖等處。每日亦往來不絕。

江寧鄉土誌

卷下

八

第五十六課 交通三 航船

由城至各鄉。通河道者。則有航船。航船共分八路。一往龍都鎮。一往湖熟鎮。一往秣陵關。一往祿口鎮。一往陶吳鎮之湖頭橋。一往王家渡。是為至漂一往三星橋。是至曹村航船碼頭。在聚寶門外。各路航船二隻。每日此來彼往。均以夜行。午後四時開駛。次日早晨即到。迨冬季水淺。則不能通行矣。

第五十七課

交通四

城鄉往來大道。約分七路。出聚寶門西南行。經安德門。小米行。西善橋。板橋。江寧鎮。牧龍亭。至銅井鎮。共八十里。由聚寶門南行。經鳳臺門。陳墟橋。東善橋。陶吳鎮。橫溪橋。至小丹陽。共九十五里。銅井以下。為往太平蕪湖之大道。小丹陽一鎮。則與安徽之當塗縣分治。半屬江寧。半屬當塗。

江寧鄉土誌

卷下

九

第五十八課

交通五

續前課

由聚寶門東南行。經岔路口。殷巷。秣陵關。至祿口鎮。共七十五里。出通濟門東南行。經高橋門。上方鎮。至淳化鎮。計三十五里。由淳化鎮偏南行二十五里。至湖熟鎮。共六十里。由淳化鎮偏東行十五里。至索墅。再十五里。至土橋。共六十五里。祿口為通溧水縣大道。湖熟為通溧水句容兩縣大道。土橋為通句容大道。在昔商務頗盛。而以湖熟為最。俗稱為小南京。

第五十九課

交通六

續前課

出朝陽門東行。經孝陵衛。馬羣。麒麟門。東流鎮。至湯水鎮。共五十里。出太平門北行。經岔路口。姚坊門。甘家巷。石埠橋。攝山渡。至龍潭。共四十五里。出神策門北行。經邁皋橋。至觀音門。共十五里。自滬寧鐵路通行。往來姚坊門。石埠橋。龍潭等處。乘火車則頃刻可到。交通較為便利。

江寧鄉土誌

卷下

十

第六十課

人物一

和風翔

倪粲

勤學

和風翔。字宇清。攝山農家子。年六七歲時。父母求之不在側。尋之。常凝立村塾外。曰。吾甚慕諸童子誦書者。家人以為誑。試於塾師。則論孟已耳熟矣。稍長。有聚徒古寺中者。因請為諸生洒掃。眾食飲之。以受書。後篤志諸經。學問淵博。倪粲。字雁園。家極貧。春秋冬皆衣絨單袍。坐處已三補矣。力學不倦。

第六十一課

人物二

戴天章 孝友

戴天章字麟郊。貧不能自存。而事親甚孝。從師力學。夏夜取大甕納雙足避蚊。讀書不倦。持身嚴正。妻林恭人。亦以孝聞。翁病齒。食遇砂稗。觸之則廢餐不食。恭人進飯。粒粒如擇。子瀚字雪村。以進士第二人視學閩中。恭人戒之曰。無忘父訓。作官不許要一錢。任滿垂橐而歸。無室可棲。其能謹遵親訓若此。

江寧鄉土誌

卷下

十一

第六十二課

人物三

葉庭鑿 孝友

葉庭鑿字金甫。江寧人。事親孝。父病。籲天願以身代。家貧。館於某氏。以母茹苦。食常舍肉。主人知之。遇佳膳輒兩器供庭鑿遺母也。後以洪楊之亂。居於京師。將歿時。謂其弟庭鈺曰。方今之患。在不誠。非特學問也。避亂十餘年。吾子弟皆廢學。我死。弟其以誠教之。誠實而未讀書。勝於讀書而不誠實也。

第六十三課

人物四

張為玉 孝友

張為玉。江寧人。性至孝。母盧。病痿不離牀褥。浣洗之役。為玉皆以躬親。一日偶出。聞鄰家火。奔歸。則火已及門。乃冒煙入。負母出。以免。家貧而性介。嘗拾得李某所遺錢夾。追還之。贈以貲。不受。惟日繪扇售之。供甘旨費。暇則述古今小說。以娛母聽。與兄弟相處。亦極友愛。

江寧鄉土誌

卷下

十二

第六十四課

人物五

倪某

賣帶翁

鬻糕者

孝友

孝陵衛倪某。賣魚牙人耳。母病癱瘓十年。奉養不倦。歲時社會。必負母出遊。每夕設酒果。說古今事。博母歡。又有賣帶孟翁。住盧妃巷。遇佳品。必市少許歸奉母。母小不快。則愀然見詞色。人皆以孝稱之。又有鬻糕者。居甘雨巷。兄若弟。潔治糕餌。鬻於市。取所贏事老母。供甘旨。怡怡以侍。

第六十五課

人物六

李恆豐

張鏞基

義行

李恆豐。上元人。居咸墅村。幼失怙。貧無所依。而志行不苟。商於楚。以信義豐其家。樂施與。尤好全孀婦節。歲旱。獨賑鄉里。平日設典肆。有質衣而以苦寒告者。檢原物還之。張鏞基。江寧南鄉麻田人。商於汴梁。清道光時。河決開封。城瀕危。鏞基出私財築隄捍衛。城賴以完。洪楊之亂。鄉人有逃往汴梁者。鏞勸募同鄉集貲。廣為收養。亂平。資之還鄉。

江寧鄉土誌

卷下

十三

第六十六課

人物七

甘延年

義行

甘延年。字靜齋。江寧人。喜施與。又好修治橋梁。周家山磯。黃天蕩。漩流最險處也。延年斲巨石為柱。鎔鐵絙百丈。風水猝變。纜舟濟險而渡。又築高橋。門荷花塘。大埭。以便行人。清咸豐三年。避亂居官山冢祠。家無長物。而所識有自賊中逃出者。猶館之。僦村廟農家。皆滿。日脫家人環瑱。易穀以食。不足。又貸益之。人高其誼。

第六十七課

人物八

湯裕昭義行

湯裕昭字君藩。上元東鄉北侯村人。慷慨好施與。見義必為。清道光二十二年。江水氾濫。民田淹沒數千畝。裕昭田僅十餘畝。歎曰。此吾責也。隨其父志。英相地勢。以西邊橋河道狹且汙。非濬不可。獨建橋。增三甕。為七費千金。有奇。農田賴焉。咸豐三年。洪楊之亂。向忠武軍餉缺乏。裕昭先後助餉萬金。凡省中避亂至者。衣食資斧。皆周之。人皆感其義。

江寧鄉土誌

卷下

十四

第六十八課

人物九

張名振

忠勇

張名振字侯服。江寧人。少伉爽。有大畧。明亡。以游擊從魯王入舟山。加富平將軍。後封定西侯。清兵分道攻之。名振使其弟名揚與劉世勛守城。而自以兵奉王擣吳淞。以牽制清兵。已而舟山被圍。名振欲還救之。潮淺不得進。舟山破。名揚及母弟二十餘人。闔門舉火自焚死。名振聞信。慟哭曰。臣誤國誤家。死不足贖。奮身欲投海。王與諸將救之。乃止。

第六十九課

人物十

續前課

嗣是往來海上。與鄭成功相結。屢以軍入長江。抵京口。至觀音門。欲圖恢復。嘗登金山。遙望石頭城。拜祭孝陵。題詩痛哭。卒之日。起坐擊牀。連呼先帝而逝。先是名振往見鄭成功。成功大言曰。汝為定西侯數年。所作何事。名振曰。中興成功。成功曰。安在。名振曰。濟則徵之。實績不濟。則方寸間耳。袒而示之背。赤心報國四字。長徑寸。深入肌膚。成功愕然謝之。

江寧鄉土誌

卷下

十五

第七十課

古蹟一

駐馬坡

靈應觀烏龍潭附

駐馬坡。在今漢西門偏西北處。漢諸葛武侯嘗奉命使吳。與吳主至石頭城下。駐馬以觀形勢。謂鍾山龍蟠。石城虎踞。即此。上為靈應觀。饗堂三楹。武侯栗主在焉。龕後供有武侯巾扇小像。丰度灑然。下為烏龍潭。旁有顏魯公放生池。一水相通。綠波蕩漾。夏時紅蓮萬柄。香遠益清。遠近遊人尋涼其際。風景可云清絕。

第七十一課 古蹟二 周處臺

周孝侯讀書臺。在城東赤石磯。即俗名老虎頭是也。侯名處。字子隱。晉常州宜興人。少時不修細行。鄉里苦之。時有三害未除之說。侯問之。父老曰。南山虎。長橋蛟。並子為三矣。侯因射虎斬蛟。入吳尋二陸。陸機折節讀書。後仕晉為將軍。死齊萬年之難。諡曰孝侯。臺與古石觀音庵同門異室。高二十餘級。有榜曰周孝侯讀書處。

江寧鄉土誌

卷下

十六

第七十二課 古蹟三 卞忠貞墓

卞忠貞公。名壺。歷仕晉元成二帝。蘇峻反。公以都督與二子盱眙同時戰死。忠貞其諡也。當公殉難時。夫人裴氏撫二子屍。哭曰。父為忠臣。子為孝子。復何恨耶。晉史稱其臣死於君。子死於父。忠孝萃於一門。是為社稷之臣。墓在朝天宮西。佳城鬱鬱。老柏蒼蒼。明清兩朝。俱載在祀典。吁。不朽已。

第七十三課

古蹟四

翠微亭

一拂祠掃葉樓

附

翠微亭一名暑風亭。在清涼山巔。為南唐後主避暑宮。山麓有一拂清忠祠。祀宋監安上門鄭公俠。公字介夫。福建人。在神宗朝。見王安石新法方嚴。痛民之疾苦。繪流民圖以上。不見用。去國。僅存一拂。人稱一拂先生。父某。嘗監江寧稅。公從父讀書清涼山寺中。故建祠於此。山南阜為掃葉樓。明遺老龔賢所居。字半千國變後。隱其姓名。自號掃葉僧。今其址改為僧庵。

江寧鄉土誌

卷下

十七

第七十四課

古蹟五

三忠祠

聚寶門外土門岡。有石碣題曰楊忠襄公剖心處。公名邦乂。仕宋為建康通判。金人入寇。陷建康。留守杜充迎降。公不屈。金人因剖腹取其心。道之西舊有二忠祠。祀公及宋文信國公天祥。其楹聯云。寧為趙氏鬼。不作他邦臣。清道光時。附以明侍郎李忠肅公邦華。改名曰三忠祠。李公為南京司馬。大有造於吾鄉者也。三公皆吉水人。故並祀之。

第七十五課

古蹟六

明故宫

血蹟石附

明故宫。在城東北。其遺址可尋者。有東安西安兩門。及午門後戟門五龍橋諸處。禁城以內。是為御街。白石寬廣。滑澤可愛。雖經五百餘年。完好者尚什之六七。因想見當年御道修整。金吾森嚴之盛。午門內丹墀有血塗石。相傳為方正學公殉節時割舌之血所濺。前清左文襄公因建祠其右。以祀正學。并立其石而築亭覆之。名曰血石亭。光復後。祠燬於火。今重建屋宇。改為古物保存所。

江寧鄉土誌

卷下

十八

第七十六課

古蹟七

孝陵

明太祖陵。在朝陽門外鍾山之陽。前清初設守陵監二員。陵戶四十名。撥給司香田地二百畝。乾隆朝裁汰監員。祇留陵戶數名。陵寢至今完好如故。道旁列翁仲石馬獅象等像。春秋佳日。遊人憑弔。出朝陽門。遙望紅牆繚繞。老檜蒼松。數百年來。歲祀不絕。誠盛典也。明李願亭林先生嘗五次晉謁於此。

第七十七課

古蹟八

顧亭林祠

顧亭林先生祠。在朝天宮內。先生初名絳。字寧人。崑山縣人。後改名炎武。自署蔣山傭。學行為東南儒者之冠。其平時論學。曰博學於文。曰行己有恥。謂自一身以至天下國家。皆學之事。自子臣弟友。以至出入往來。辭受取與之間。皆有恥之事。明亡不仕。往來金陵。五謁孝陵。寓朝天宮。後人即其地建祠以祀之。

江寧鄉土誌

卷下

十九

第七十八課 田賦一

江寧田賦。有民賦。衛賦。蘆課之分。在昔係上元江寧兩縣分治。故科則不同。民賦田地。有上則下則之別。科則分科。銀科。米科。豆三項。衛賦田地。有銀無米。蘆課田地。洲灘各則不等。民國成立後。兩縣并而為一。田賦科則。仍照舊制。惟前清時完銀一兩。折收錢二千二百文。加耗一錢。折收錢二百二十文。完米一石。折錢四千五百文。今則完銀一兩。收銀幣一元五角。完米一石。收銀幣四元。

第七十九課 田賦二

全縣田地共一萬二千九百十七頃五畝有奇。額征科銀六萬一千四百九十九兩有奇。額征科米二萬六千四百八十九石有奇。現定於正稅之外。每銀一兩。征收附稅銀三角。每漕米一石。征收附稅銀一元。作地方自治經費。謂之附加稅。全縣附稅共應得四萬五千五百五十四元有奇。又每田地一畝。上下兩忙各帶征錢十文。為公益捐。合成銀幣。共約得一萬七千四百餘元。

第八十課 結論

昔人謂金陵之俗。長於持論。短於有為。勇於發端。怯於臨事。斯語也。於寧邑一般人民之性質。言之最為真切。蓋南方水土柔和。生其間者。常少剛毅之氣。堅忍之志。又自六代以來。金陵為東南都會。五方雜處。人情渙散。故無團結之力。用是安於惰弱。而不能建偉大之事業。自今以往。吾寧之人。於昔人所言。力矯其失。庶乎可矣。